

## Kálag e'só eche Jɔnɛ Ndibned n kálag

Metɔte méde mébe míme mékǎá bon Jɔnɛ átɛl kálag e e'só. Atɔte dé e'só ádíi áwéd bad ábe áténlé chó nlém á abum ábel bébê mod nhóg ne Dyõb ne awe Mwǎn, Yesu Krístæ.

Metɔte míme mélónténé mébe médii, Jɔnɛ alánge bad ábe áténlé chó aá bétéd pónde ne ayáge dé metóm ayále débēbēd abé áde bédíi mod nhóg ne Dyõb ne Yesu Krístæ. Adê ayáge dé metóm áhóbe nén bán ebébtéd épag ne abé áde moonyon abágkē á nkõnsé tē, bán né-ɔó, Yesuɛ, Mwǎn a Dyõb eéhele' aá-se ákõn moonyon abé. Abê bemeléede bé metóm béhóbe nén bán nzé mod ákũd e'sooson, atánjéné nēe ábáá mekan mé nkõnsé á yǎl. Báyágte ámpē nén bán e'sooson béewóó' é dyamdyam ábel ne abé á bwám ne áwón edánge ne nhóg ne aníníi.

Alúmed aá adê ayáge déetángené Jɔnɛ alúmté á kálag tē wén aá Yesuɛ ankõn moonyon abé akoó- 'é alúmed áte nén aá bad ábe bédúbpé Yesuɛ bon bédān-' é Dyõb bétánjéné nēe bédáá nhóg ne aníníi.

### **Nkabtéd n kálag**

Ndibned 1.1-4

E'nyínen bé ekíde ne ehíntén 1.5-2.29

Bǎn bé Dyõb ne bǎn bé Satanɛ 3.1-24

Mbále ne awusé 4.1-6

Chõm éche edánge édíi 4.7-21

Adúbe áde átómé mekan mésyāal áte 5.1-21

### *Eyale é alongé*

<sup>1</sup> Ntenle' nyé tâṅgene ane awě adé Eyale é Dyöb éche épεene' alongé. Abédé se á mbooted, sênwóg mam tâṅgene mós, sênnyínén mós mǐd, sêmbán mós dǐd áyǎl, sêmbán-ne mós ekáá á yǎl.

<sup>2</sup> Mós awě apεene' alongé antīm moonyon awě bényínnéé dǐd, dennýin-ne mós. Sêbǐde' mós mbón, sélāṅgē-'ε nyé mam tâṅgene mós awě abage' alongé áde déemaá', mós awě ambé ne Titée, bon átīm abyéen átǐnté echêd.

<sup>3</sup> Chóm éche sényíné, éche séwógé-'ε, chós sélāṅgēé nyé, âbel bon nyébê nlatén ne sé. Mmēd nlatén-ne ndii nlatén míme déwóó ne Titée ne awe Mwǎn Yesu Krístæ.

<sup>4</sup> Sêtelé enén kálag, âbel bon mímeḍ menyinḡe mélôn mbon.

### *Alongé á bad ábe bédé á e'nyínen bé ekide*

<sup>5</sup> Bóob-póó, póle echě séwógé á nsal wée Yesu Krístæ bon sélāṅgē-'ε nyé edii nén, Dyöb ádii e'nyínen bé ekide. Atón dé mbéb ké ahóg déesaá mós á yǎl.

<sup>6</sup> Nzé dehóbé bán dedé nlatén ne mós áde alongé ádēd ádii ádíí alongé dé ehíntén, né dekale metóm né míme syánē mbeltéd-te mééhǐdēē mbále.

<sup>7</sup> Bon nzé dewóó alongé dé e'nyínen bé ekide ngáne Mwën-ne ámpē áwóó, né syánē déēbē nlatén ne nhóg ne aníníí, mekií míme Yesuε awe Mwǎn, mós-'ε méwobé mímesyánē mbéb nsyǎl.

<sup>8</sup> Nzé dehóbé bán deewóó'é atón dé mbéb ké ahóg á yǎl, né dedoge' échēd yǎl, né mbále-'ε eésaá syánē áte.

<sup>9</sup> Nzé depanle' mímesyánē mbéb áte, né âbēl ngáne áhóbé, âbēl-le chó nyaa echě etāṅgéné.

Alagsén syánē mbéb, áwōbē-’ε nímesyánē mbéb n̄syāāl.

<sup>10</sup> Nzé dehóbé bán deébeλεέ mbéb, né dehóbe’ bán Dyöb ádíi nkal a metóm, né eyale é Dyöb éesaá-’aá syánē áte.

## 2

### *Jone ad Krístəə mó adé awesyánē Nwōngene*

<sup>1</sup> Nyé ábe nyédé nēngáne ábēm bán, ntenle nyé enén kálag, ábel boŋ nyéebēlē mbéb. Boŋ nzé mod abelé mbéb, syánē dewóó mod awě abele’ mekan níme métəngéné, Yesu Krístəə. Mó achənge’ syánē Titée.

<sup>2</sup> Krístəə mwēn-εé ambé nēngáne ndε echě Dyöb dēmbenlédte ákəde syánē áyāl e mbéb níme dēmbenlé. Ambel nē ábel dékud alagsen. Saá-kaá mbéb nímesyánē mēmpen, boŋ mbéb níme bad bé nkōŋsé bésyāāl.

<sup>3</sup> Nzé dehíde’ mbéndé é Dyöb né édé mbále bán debíí mó.

<sup>4</sup> Kénzée awě ahóbé aá móbīí mó, boŋ eehíde’ éche mbéndé, né ene ndín e mod adíi nkal a metóm, né mbále ké póg éesaá-’aa mó áte.

<sup>5</sup> Boŋ kénzée awě abele’ ngáne eyale é Dyöb éhóbée, edənge éche ene ndín e mod ádáá Dyöb élóne’ mbon. Nén dōó abele’ boŋ debíí ne mbále bán dedé ne Dyöb.

<sup>6</sup> Kénzée awě ahóbé aá módē ne Dyöb, áde alongé átəngéné abé nēngáne alongé áde Yesu Krístəə.

### *Mbéndé e ekóólé*

<sup>7</sup> A-baányan̄ bé edənge, enén mbéndé echě n̄itenléé nyé éesaá mbéndé e ekóólé, edíi mbéndé e nchun echě nyénwōngē se á mbooted. Enén

mbéndé e nchun edii nkalanj ní bwâm míme nyémáá awóg.

<sup>8</sup> Boj kénéê, mbéndé e ekóólé chóo nitenléé nyé bəəb, mbále echě edé-’ε á mbéndé-te wê, enyínnédé á alongé áde Krístəə, enyínnéd-te á alongé ádēn, áyāle nēn ehíntén ébóótédé amaa, e’nyínen bé ekíde é’ mbále é’ máá abooted dé apen.

<sup>9</sup> Kénzée awě ahóbé aá módē á e’nyínen bé ekíde boj ákəə mwānyan, ene ndín e mod adii adé á ehíntén-tê.

<sup>10</sup> Kénzée awě adəə mwānyan adé á e’nyínen bé ekíde-tê. Né-əó, ene ndín e mod éēbēlēē dyamdyam áde ábelte’ bad bémpeē mbéb.

<sup>11</sup> Boj kénzée awě akəə mwānyan, awóó alongé dé ehíntén. Ene ndín e mod akag á ehínten-tê eebyéé-’aá wēε ákagké áyāle ehíntén ébélé adé nēε mod awě akwedé ndím.

<sup>12</sup> Nyé ábe nyédé nēngáne ábēm bān, ntenle nyé áyāle Dyəb álágséné nyé mbéb á dīn áde Yesu Krístəə.

<sup>13</sup> A-besān, ntenle nyé áyāle nyēbíí ane awě adé se á mbooted. A-kódébad, ntenle nyé, áyāle nyētómé ane awě adé ebébtéd áte.

<sup>14</sup> A-bānbān, ntenle’ nyé áyāle nyēbíí Titée. A-besān, ntenle nyé, áyāle nyēbíí ane awě adé se á mbooted. A-kódébad ntenle nyé, áyāle nyēwúú áte, eyale é Dyəb edé nyé áte nyētómé-’ε ane awe adé ebébtéd áte.

<sup>15</sup> Nyéēdəə’ nkənsé ké’ε bwēm ábe é’dé áwēd-te. Nzé mod adəə nkənsé, né eédəə’é Titée.

<sup>16</sup> Bwēm é’syāāl ábe é’dé á nkənsé te, nédē bwēm ábe moonoyon a ekob áwóó’é esíí áte, bwēm ábe

m̄id m̄édəə' é anyín ne bwēm ábe bad békumneé ekáá á tâl, béēhúu' é ne Titée, é'dii bwēm bé nkõjsé.

17 Nkõjsé ne ábe bwēm é'syāal ábe baányonj béwóo' é esíí áte áyāl echáb, rítóme tómén, boj mod awě abele' ngáne Dyõb áhedeé, abág ne Dyõb á ngíndé ne á ngíndé.

*Jone ad nyétéd pónde  
ne bad ábe bét̄ngan Kr̄stə*

18 A-bānbān, asóg ákwógé apɛ. Bénlāa nyé bán Mod a Ekoyí awě Kr̄stə äpě, bəɔb-pe bad bé ekoyí híin ábe Kr̄stə bémáá apɛ. Né-ɔó, debíí bán asóg ákwógé apɛ.

19 Abē bad bénkēnkongé bad abé ábe bédé mímesyānē nlatén, né-'aá dēnkōj boj bétēdē syānē. Nzé bēmbē bad ábe bédé áwesyānē nlatén, né bēmbē bēbé ne syānē, boj bēnchené syānē ábel boj ényínned ne mbále nén bán bénkēnkongé abé ne syānē.

20 Boj ne nyé, Ane-awě-Béwógté abagé nyé Edəádəj éche Esáá. Né-ɔó, nyé moosyāal nyēbíí mbále.

21 Meétēnlē nyé enén kálag áyāle nyēbíí' é mbále, boj ntenle' nyé chó áyāle nyēbíí mbále, nyēbíí'-ε nén bán metóm ké mehóg méēbīdē á mbále-tē.

22 Nzéé-'ō adé nkal a metóm? Nkal a metóm adii kenzéé awě ahóbé aá, Yesue eésáá Ane awě Dyõb Áwógté. Ene ndín e mod chó edé Mod a Ekoyí awe Kr̄stə, abáá' Titée á yāl, ábāā'-ε Mwän.

23 Mod éēhēlē-se abāj Mwän a Dyõb á yāl se abé ne Titée. Kenzéé awe akobé Mwän a Dyõb, akobé kóəj ne Titée.

24 Nyényin nén bán nkalan míme nyéwógé se á mbooted ídé nyé áte. Nzé nkalan míme nyéwógé, ídíi ídé nyé áte, né nyémpē nyéēbē ne Mwän a Dyöb nyébé-’ε ne Titée.

25 Chöm éche Krīstəə áhóbé aá mósḃḅ syánē édii alongé áde déemaá’.

26 Ntenle nyé nímén mam áyāle bad bédé ábe béhede nyé adog.

27 Boḅ ne nyé, Krīstəə abagé nyé Edəádəḅ éche Esáá. Abé áde échē Edəádəḅ édii nyé áte, nyéetógnενεé modmod áyáged nyé. Echē edəádəḅ éyágte nyé mam mésyāāl, mam míme éyágte-’áa nyé médé mbále, méesaá metóm. Né-ḳó, nyébê nyébê ne Krīstəə ngáne Edəádəḅ éche Esáá éyágte nyé.

28 Bəḅb-pḳó, a-bānbān, nyébê mod nhóg ne mó, ábel boḅ epun éche áπεέ, nlém íwúu syánē á abum, deewógé-’ε e’sôn átyém mó á’sō.

29 Nyébíi bán Krīstəə abele mekan míme métáḅgéné á’sō é’ Dyöb, né-ḳó, nyébii bán kénzée awē abele’ mekan míme métáḅgéné, adii mwän a Dyöb.

### 3

#### *Jone ahóbé ngáne alongé áde bán bé Dyöb átáḅgéné abé*

1 Nyényin ndín e edəḅge echē Titée ádáá syánē. Echē edəḅge échábé ámín káəḅ béchəge syánē bán bán bé Dyöb, bēn-naá dékóó abé. Nzəm echē ekəá boḅ bad bé nkḳḅsé béēbíi syánē edii áyāle béēsēbπεέ Titée abii.

<sup>2</sup> A-baányanḡ bé edəŋge, syánē dedii bǎn bé Dyöb bəəb. Eēbyēēnēē bwām pən chōm-ée syánē débēē. Bon debíi bǎn pón dé eché Krīstəə áπεέ, syánē déēbē nēŋgáne mó, áyāle nén deényin mó ngáne ádíi.

<sup>3</sup> Kénzée awě asumé nlém wée Krīstəə atəŋgéné nēe asəŋté eche yǎl ngáne Krīstəə mwən ámpē ásáá.

<sup>4</sup> Kénzée awě abelé mbéb, akwedé nkáá áyāle abóo mbéndé e Dyöb. Mbéb rdii abóo á mbéndé e Dyöb.

<sup>5</sup> Nyébíi bǎn epε éche Krīstəə ámpεé á nkōŋsé ébédée ámad mbéb. Krīstəə mwən-ne eewóó'ε mbéb ké nhóg á yǎl.

<sup>6</sup> Kénzée awě adé ne Krīstəə éēbēlēē mbéb. Kénzée awě abele mbéb, eenyinée Krīstəə eebii-'áa mó.

<sup>7</sup> A-bǎnbǎn, nyéēm wāg se mod ádog nyé. Kénzée awě abele mekan míme métəŋgéné adii mod awě abele mekan míme métəŋgéné á'sō é' Dyöb, ngáne Krīstəə ábeléé mekan míme métəŋgéné.

<sup>8</sup> Kénzée awě abele mbéb, adii mwǎn awě Devəle áyāle Devəle ambootéd mbéb abel sé á mbootéd. Nzəm eché enkəŋ bon Mwǎn a Dyöb áπε á nkōŋsé, ebédée ábébed nsón míme Devəle ábélé.

<sup>9</sup> Kénzée awě adé mwǎn a Dyöb, éēbēlēē mbéb, áyāle abé á Dyöb adé mó áte, éēhēlēē-'ε-se abelé mbéb áyāle Dyöb dáo adé mó Sáá.

<sup>10</sup> Chōm éche ékoo' syánē alúmed bad ábe bédé bǎn bé Dyöb ne ábe bédé bǎn bé Satan edii nén bǎn, bad ábe béebelé' mam míme métəŋgéné ne bad ábe bédəə baányanḡ bé Krīsto, béesaá bǎn bé Dyöb.

*Jone ad bad bédəŋ nhóg ne aníníí*

11 Nkalaŋ mí bwám míme nyénwōgkē se á mbooted mbédéε nén bán, dédəŋ nhóg ne aníníí.

12 Deebág nées Keene. Keene abédéε mod awě Sa-tane, anwúú-’ε mwănyaŋ. Cheé ênkăŋ boŋ Keene awúú mwănyaŋ? Anwúú mós áyāle mekan míme mwěn ábélé’áá mébédé mam mé mbéb boŋ míme mwănyaŋ méntāŋgēn á’sō é’ Dyōb.

13 Né-óó, a-baányaŋ, nyéebág menyáké ngáne bad bé nkōŋsé békóó nyé.

14 Dedəó bānned bé Krīsto bémpēe, nê dós ábélé boŋ debíí bán dehídté ásē e ngíne e kwééd dekuδέ alongé áde déemaá’. Kénzée awě eédəə bānned bé Krīsto bémpēe, alyəgé adé ásē e ngíne e kwééd.

15 Kénzée awě akóó mwănyaŋ a Krīsto, adíi mod a ewúen, nyébíí-’ε nén bán alongé áde déemaá’ déesaá mod a ewúen ké nhóg áte.

16 Krīstəə ambě áde alongé á nló mímēd. Nén dós ábélé boŋ debíí chōm éche edəŋge édíí. Né-óó, syánē ámpē detəŋgéné nées débágé ádēd alongé á nló míme bānned bé Krīsto bémpēe.

17 Nzé mod adé awě adé nhən, boŋ anyíne mwănyaŋ awě atóge’ boŋ eewóo nlém mí bwám áwōŋgen mós, chán áhelesε ahób áá módəə Dyōb?

18 A-bānbān, edəŋge éche déwánléné nhóg ne aníníí, éetəŋgené abé dásō á nsəl-tē ne á póle boŋ étəŋgéné abé á mbéltéd ne á mbále-tē.

*Jone ahóbé chōm éche ébele’  
boŋ deewógé mbwóg á’sō é’ Dyōb*

19 Nzé delúmté nhóg ne aníníí edəŋge, né debíí bán dedé bad bé mbále ne debíí-’ε bán nlém méwūū syánē á abum á’sō é’ Dyōb.



<sup>20</sup> Póndé ké ehéé echě nímēd mewēmtεν mélánge syánē bán debelé mbéb, debíi bán Dyöb ábíi mam mésyā́l tómaa ngáne syánē débíi.

<sup>21</sup> A-baányan bé edənge, nzé nimesyánē mewēmtεν méelānge syánē bán dedii bebel bé mbéb, deewógéé mbwóg ké nhóg nzé dekānne' á'sō é' Dyöb.

<sup>22</sup> Dekude kéchéé éche désédte mó áyāle dehíde' éche mbéndé débélé-'ε mam nime méwógte mó menyinge.

<sup>23</sup> Mbéndé echě ábágé, edii nén, dedúbe á dīn áde awe Mwān Yesu Krístəə, dedəŋ-'ε nhóg ne aníní. Melemlem mé mbéndé móə Krístəə mómpē āmbéé syánē.

<sup>24</sup> Kénzée-'ε awě ahíde' mbéndé é Dyöb, abág mod nhóg ne Dyöb, Dyöb-pe ábē mod nhóg ne mó. Nén dś-'aa débéléé bon debíi bán Dyöb áde ne syánē. Debíi áned áyāle Edəádəŋ éche ábágé syánē.

## 4

### *Jone ahóbe aá bad bétêd póndé ne e'dəádəŋ bé metóm*

<sup>1</sup> A-baányan bé edənge, nyéedúbpe bad bésyā́l ábe béhóbe' bán béwóó Edəádəŋ é Dyöb. Bon pen, nyékəg bó ábíi nzé edəádəŋ éche édé bó áte éhúú ne Dyöb. Nyékəg bó áyāle ekud é bekal bé'dəádəŋ bé metóm bépédé á nköŋsé-te.

<sup>2</sup> Chöm éche wébenlé bon ebíi mod awě Edəádəŋ é Dyöb edíi áte edíi; kénzée awě ahóbe aá Yesu Krístəə apedé á nköŋsé née moonyon, né ane mod awóó Edəádəŋ é Dyöb.

<sup>3</sup> Bon kénzéé awě ahóbé aá Yesue eépedeé á nkõjsé nées moonyon, eewóó'é Edæádæŋ é Dyõb áte. Edæádæŋ éche ene ndín e mod áwóó áte édii edæádæŋ éche ehúú ne Mod a Ebébtéd. Nyênwóg bán échén edæádæŋ épě, bɔɔb-pe émáá ape á nkõjsé-te.

<sup>4</sup> A-bănbăn nyédii bad bé Dyõb, nyêtómé-'ε ábê bekal bé'dæádæŋ bé metóm áte, áyāle Edæádæŋ éche édé nyé áte édé ngíne tómaa Satanε awě akamlan bad bé nkõjsé.

<sup>5</sup> Abê bekal bé'dæádæŋ bé metóm bédii bad bé nkõjsé, né-ɔɔ, mekan níme béhóbeé médii mekan mé nkõjsé, bad bé nkõjsé-'ε béwóglan bó.

<sup>6</sup> Syánē dedii bad bé Dyõb. Kénzéé awě abii Dyõb awóglan syánē, kénzéé-'ε awě eesē mod a Dyõb, eewóglánné syánē. Né-ɔɔ, nén dɔɔ mod áhele abii nhəŋlén átintē e Edæádæŋ é mbále ne edæádæŋ é metóm.

### *Jone aá Dyõb ádáá syánē*

<sup>7</sup> A-baányan bé edəŋge, dédəŋ nhóg ne aníní áyāle nén edəŋge éhúú ne Dyõb. Kénzéé-'ε awě adáá mwănyan a Krísto adii mwăn a Dyõb, abii-'ε Dyõb.

<sup>8</sup> Kénzéé awě eédəə baányan bé Krísto, eebii'ε Dyõb, áyāle kéchéé éche Dyõb ábeleé élúmté' edəŋge éche áwóŋné bad.

<sup>9</sup> Dyõb álúmté syánē edəŋge ne nén, alómé nímé mpɔm ní Mwăn á nkõjsé-te ábel bon dékud alongé áde déemaá' mbwiined ne mós.

<sup>10</sup> Chòm éche édé edəŋge édii nén, saké bán syánē dedəə Dyõb, bon nén Dyõb ádáá syánē, anlóm-me awe Mwăn ákɔde syánē áyāl e mbéb níme débélé.

11 A-baányan bé edaŋge, ngáne édíí bán Dyõb átómténé syánē adañ, syánē ámpē detañgéné dédañ nhóg ne aníníí.

12 Mod eényĩnēē Dyõb mbêd. Nzé dedəá nhóg ne aníníí, né Dyõb débē ne syánē, échē edaŋge-’ε éche ádáá syánē élõn mbon.

13 Nén dó-’aá débēl bon débíí bán syánē dedé ne Dyõb, Dyõb-pe ádé ne syánē, áyāle abagé syánē échē Edəádāñ.

14 Syánē denyíiné, delānge-’ε bad bémpēe nén bán Titēε alómé awe Mwän ábé Nsoode a nkõñsé.

15 Bad ábe béhóbe’ bán Yesue adíí Mwän a Dyõb, Dyõb ádé ne bó, bó-’ε bédé ne Dyõb.

16 Né-óó, syánē debíí, dedúbpe-’ε edaŋge éche Dyõb ádáá syánē.

Kéchéé éche Dyõb ábeleé élúmte edaŋge éche áwónné bad, bad-te ábe edaŋge édíí áte, bédé ne Dyõb. Dyõb-pe ádé ne bó.

17 Edaŋge éche édé syánē áte, élóné mbon ne nén, nlém méwū syánē áte á mbwε mé nkáásé, áyāle nén dedé mod nhóg ne Dyõb á nkõñsé-te hén melemlem ngáne Krĩstəə ámbēē ne mó.

18 Mod awē Dyõb ádáá eewógéé mbwóg. Edaŋge éche élóné mbon énane mbwóg rĩsyāal. Abāñ dé nkógsén dóo ápeene mbwóg. Né-óó, kénzée awē mbwóg rídíí áte, edaŋge éelónéé mó mbon áte.

19 Delúmte’ edaŋge áyāle Dyõb ásébpé syánē edaŋge alúmed.

20 Nzé mod ahóbé aá módəá Dyõb bon akóó mwānyan a Krĩsto, ane mod akale metóm, áyāle mod awē eédəə mwānyan awē ányíneé, éēhēlēē-se ádāñ Dyõb áde eényĩnēē.

21 Né-ɔ́, enén mbéndé chɔ́ bɛ́bágé syánē; kénzéé awě adə́ Dyɔ́b ádəŋ káəŋne mwányan.

## 5

### *Jone ad bad abe bédúbpé* *Křístə bétómé nkõŋsé áte*

1 Kénzéé awě adúbpé aá Yesue mó adé Ane awě Dyɔ́b Awógté, adii mwän a Dyɔ́b. Kénzéé-’ε awě adə́ sáá-a-mwän adə́ káəŋne mwän.

2 Nyaa echě débíé’ é bán dedə́ bán bé Dyɔ́b edii nén bán syánē dedə́ Dyɔ́b, dekonŋe-’ε échē mbéndé.

3 Adəŋ Dyɔ́b adii áhíd éche mbéndé, éche mbéndé-’ε éetómteneé awúu áte syánē áhíd ch́.

4 Kénzéé awě adé mwän a Dyɔ́b atómé nkõŋsé áte. Nzəm echě atómé nkõŋsé áte, edii nén, dedúbpé bán Yesue mó adé Ane awě Dyɔ́b Awógté.

5 Modmod ampée eésaá awě atóme nkõŋsé áte éetóméé mod awě adúbpé aá Yesue adii Mwän a Dyɔ́b.

### *Jone ahóbé bwēm é’láán abe é’bide Yesue mbón*

6 Yesu Křístə ampě á nkõŋsé. Bëndusén mó ne mendíb bon ámbíd e pónde echě áwédé á awɔg nímē mekií mēnsyógé. Saké edusen é mendíb chēmpen ēmbenléd ne mó, bon áde áwédé nímē mekií mēnsyógé. Edə́dəŋ éche Esáá chɔ́ élúmte syánē aá nén áde mbále, áyāle Edə́dəŋ éche Esáá éekaléé metóm.

7 Nyaa édé éláán ábíi mbále t̄ŋŋene Yesue.

8 Debíi mbále t̄ŋŋene Yesue áyāle Edə́dəŋ élanŋgé syánē, bëndusén mó ne mendíb, ansyóg-ke

mímē mekií áde áwédé. Echén nyaa éláán ésyā́l élúmte syánē bán Yesue adii Mwǎn a Dyöb.

<sup>9</sup> Ngáne dedúbpé mekan míme bad béhóbéé, kéchéé éche Dyöb álângeé syánē étómténé etógnén abé tómaa mekan míme bad bélângeé syánē. Nén ádé áyāle Dyöb दें दूँ álánge syánē, tângene awe Mwǎn.

<sup>10</sup> Kénzée awě adúbpé Mwǎn a Dyöb, abíí nén aá mímén mekan mésyā́l méde mbále. Boŋ kénzée awě eedúbpé Dyöb, édíí nêngáne ahóbe' aá Dyöb ádíí nkal a metóm, áyāle eedúbpéé mekan míme Dyöb áhóbé tângene awe Mwǎn.

<sup>11</sup> Chöm éche Dyöb álánge syánē édíí nén; abelé syánē dekudé alonje áde déemaá'. Adén alonje ádíí alonje áde awe Mwǎn ábageé.

<sup>12</sup> Kénzée awě adé nhóg ne Mwǎn a Dyöb akudé ádé alonje, kénzée-ε awě eesē nhóg ne Mwǎn a Dyöb, eékudéé ádé alonje.

*Déwōngēn nhóg ne aníití  
ákuḍ alonje áde déemaá'*

<sup>13</sup> Ntenle' nyé ábe nyédúbpé á dīn á Mwǎn a Dyöb, ábel boŋ nyébíí bán nyékudé alonje áde déemaá'.

<sup>14</sup> Desumé nlém nén bán, kéchéé éche déhédné Dyöb ngáne ébóhnedé mó, abelé awóg syánē mekáne.

<sup>15</sup> Ngáne débíí-ε bán awóge' syánē áyāl e kéchéé éche déhédné mó, detángeé abíí bán abage syánē kéchéé éche déhédné mó.

<sup>16</sup> Nzé mod anyíne mwǎnyaŋ abele mbéb míme méepiinéd mó kwééd, atángeé akánnéd mó. Dyöb débě ane mod alonje. Bad ábe ríhóbéé meé nyékánned bédíí bad ábe mbéb mímāb méebelée

boŋ échāb edāádəŋ éwé. Mbéb ńdé níme mbéle boŋ edāádəŋ éwé. Nzé mod abelé ene ndín e mbéb meehóbéé meé nyékānneɗ ane mod.

<sup>17</sup> Mewusé mészāāl médií mbéb, boŋ donge dé mbéb ádé áde déebelé boŋ edāádəŋ éwé.

<sup>18</sup> Debíí nén bán kénzéé awě adé mwān a Dyõb eébhēē mbéb, áyāle Mwān a Dyõb akəŋge mó, Ane awě adé Ebébtéd eébhēē-’ε-sε ábel mó mbéb.

<sup>19</sup> Debíí bán dedíí bán bé Dyõb debíí-’ε nén bán Ane awě adé Ebébtéd akamlan bad bészāāl ábe béebíí Dyõb.

<sup>20</sup> Debíí nén bán Mwān a Dyõb apedé á nkõŋsé-te abagé-’ε syánē nsõŋten ábíí Dyõb á mbále. Dedé-’ε mod nhóg ne mó áyāle dedé mod nhóg ne awe Mwān, Yesu Krístə. Mwēnpen-naá adé Dyõb, mwēn-naá abage bad alongé áde déemaá’.

<sup>21</sup> A-bānbān, nyéewóó’ dyamdyam ábel ne myõb mé metóm.

**Mel̃ Mékōōlē**  
**New Testament in Akoose (CM:bss:Akoose)**

copyright © 2011 Wycliffe Bible Translators, Inc.

Language: Akoose

Translation by: Wycliffe Bible Translators, Inc.

Akoose

bss

Cameroon

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Akoose

**© 2011, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

PDF generated using Haiola and XeLaTeX on 18 Apr 2025 from source files dated 29 Jan 2022

0143729f-907e-5098-b6ce-63b1629b8e48